

Meditashon Pagano

Pa bastante aña, sientífikonan sa ku mente humano ta aktivo 24 ora pa dia. Asta ora bo ta drumi, e selebre ta sigui funshoná. Motibu ku bo ta soña ta pasobra bo mente ta keda aktivo durante oranan di anochi maske bo ta inkonsiente, na soño.

Ma influensianan di religionnan pagano na nos islanan (e.o. hinduismo, budismo, yoga, “new age”, èts.) ke kambia nos perspektiva. Nan ta promové e konsepto ku hende mester hasi nan menta bashí di tur pensamentu konsiente dor di meditashon.

Hopi hende na nos islanan ku ta yama nan mes “kristian” ta sigui siegamente e práktikanan di paganismo. Nan ta haña ku meditashon transedental ta algu inosente. Sigur tin benefisio tantu pa kurpa komo selebre pa hasi bo mente bashi di tur problema di bida i djis pensa tokante *nada*. Kombiná esei ku ehersisionan ku ta eksigí demasiado konsentrashon i bo preshon di sanger lo baha i bo kurpa lo sinti mihó.

E praktika aki di meditashon por zona inosente. Ma en realidat, e ta algu sumamente peligroso! Nota dos peliger.

1) Skritura ta siña kla ku hende no ta so den universo. Otro ser spiritual tambe t’ei: Dios, angelnan, Satanas, i demoñonan. Ora bo ta saka algu for di bo mente, algu otro ta remplas’é. E mente humano no por keda bashí. Ora bo ta hasi bo mente bashí dor di meditashon, bo ta duna sernan spiritual maligno oportunitat pa infiltrá bo mente.

2) Tras di e konsepto aki di meditashon tin kreensianan pagano. Tin, por ehèmpel, e siñansa ku dios ta tur kos i tur kos ta dios. Meta di hende mester ta pa su alma uni ku dios, e un forsa uní di universo. Pensamentunan konsiente i rashonal ta strobábo di realisá e unidat místiko aki ku dios. “Tanten ku bo ta pensa tokante *algu*, bo ta konsiente ku bo ta distinto for di universo. Pesei bo mester tin un eksperensia ku ta pone e distinshonnan ei disparesé, pa bo por pèrdè bo identidat manera un gota di awa den un laman grandi di energia impersonal. Pa logra esaki, *bo mester destruí bo mente*” (Lutzer & DeVries).

Esnan ku ta propagandá e forma aki di meditashon na nos islanan, ta kontradisí dirèkt loke Skritura ta bisa. Meditashon bíbliko, ta totalmente distinto for di e meditashon promové pa e influensianan religioso di oriente.

Beibel ta papia kla tokante meditashon. Ma Palabra di Dios su konsepto di meditashon ta totalmente distinto. **Dios nunca ta enkurashá hende pa hasi nan mente bashí di tur pensamentu konsiente.** Alkontrario, **Skritura ta mustra kla ku ora un persona ta meditá, e ta pensa tokante algu.**

Di bèrdat, un konsepto ligá ku meditashon den Beibel ta e idea di “herkauw”. Un kabritu ta kome yerba i gulié. Despues e ta bai drumi i ta bolbe kou e mesun kuminda pa e saka tur e nutrishon for lokual el a kome. E ta ripití e proseso aki tres bes.

Meditashon bíbliko tin e mesun idea. Bo ta pensa tokante algu, ta bolbe pens’é despues, i atrobe ta trese e pensamentu bek na bo mente konsiente.

Kiko bo mester pensa i bolbe pensa...meditá? Palabra di Dios mes. Beibel ta bisa, “*Su delisia ta den e lei di SEÑOR, i den Su lei e ta meditá di dia i anochi*” (Salmo 1:3). “*E buki di lei aki lo no apartá for di bo boka, ma bo mester meditá den dje di dia i anochi, pa bo pèrkurá di hasi konforme tur loke ta pará skirbí den dje...*” (Josué 1:8). **Na lugá di hasi bo mente bashí, Dios ta bisa pa yen’é ku Skritura.** Ripará tambe ku e motibu pa meditá den Beibel ta pa bo ahustá bo bida na loke e ta bisa.

Esei ta presis un motibu ku hopi hende no ke meditá na e forma ku Beibel ta preskribí... **pasobra nan no ke ahustá nan bida na Dios Su instrukshon.** Esei tambe ta un motibu ku tantu hende ku ta yama nan mes “kristian” ta rechasá meditashon bíbliko i ta preferá hasi nan mente bashí ku meditashon pagano.